

# Per ch'ils Grischuns restian ils pli sportivs

La regenza ha approvà il concept per promover il sport

■ (anr/fa) **Cun 22 mesiras en plirs secturs, sco sport d'uffants e giuventetgna, sport da prestaziun ed arranschaments sportivs, duai il sport en Grischun vegnir optimà. Ier è vegnì preschentà il concept correspondent.**

Tenor studis èn las Grischunas ed ils Grischuns las persunas svizras las pli sportivas. «Il chantun Grischun dispona plinavant d'in grond dumber da cursas ed auters arranschaments sportivs impurtants sco p. ex. dacurt il Tour de Ski a Lai u proxim onn il Campiunadi mundial da skis a San Murezzan», ha ditg cusseglier guvernativ *Martin Jäger* mesemna cun preschentar als meds da massa il nov concept per promover il sport ed il moviment. Preschents a l'orientaziun eran era *Thierry Jeanneret* che maina tar l'uffizi da la scola populara ed il sport la partiziun «sport» e *Remo Cavegn*, il president da l'Uniun grischuna per sport (UGS). «En pli tutgan atletas ed atlets gischuns tar l'elita mundiala», ha cuntinuà Jäger, «els èn exempels per nossa giuventetgna e gidan ad entusiasmar uffants e giuvenils per il sport.» La lescha da promoziun dal sport en vigor dapi il 1. d'avust 2015 aveva obligà la regenza da relaschar in concept cumplexiv per promover il sport ed il moviment. Jeanneret ha preschentà il concept detaglià ch'è vegnì elavurà en collavuraziun cun las federaziuns da sport grischunas.

## Scleri il basegn e decis las mesiras per l'avegnir

«En il concept èn fixadas per ils proxims onns 22 finamiras per optimar la purschida e mesiras per cuntanscher quellas», ha ditg *Thierry Jeanneret*, «e quai



**Remo Cavegn (a san.), Martin Jäger e Thierry Jeanneret cun il concept per la promoziun dal sport ch'è cumpari en las trais linguas grischunas.**

FOTO F. ANDRY

en ils secturs sport d'uffants e giuventetgna, sport da scola, sport da massa, sport da prestaziun, arranschaments sportivs, infrastruttura sco er infurmaziun e cussegliaziun.» Differentas finamiras concernan la promoziun d'uffants e giuvenils. Il chantun veglia s'engaschar

per la qualidat en l'instrucziun da sport en las scolas, ha el ditg, «i duai era vegnir tegnì quint da l'impurtanza dal sport da naiv en Grischun cun facilitar als uffants l'access al sport sin naiv.» Grazia a differents studis san ins che a partir dal 13avel onn da vita fetschian ils giuvenils

adina damain sport e sortian era savens dals clubs da sport. Cun scolar giuvnas manadras e giuvens manaders da sport e surdar ad els responsabladad en lur uniun da sport vules il chantun franar quel svilup. «Cun agid da campagnas ed iniziativa per sport e moviment duai la

popolaziun era vesair l'influenza positiva dal sport per lur sanadad», ha el menziunà ed orientà ch'ins veglia organisar en il chantun er in di dal sport.

## Promover la cumpatibladad da sport e scola

Il chantun Grischun posseda ina bun'infrastructura d'implants da sport. Quels duain tenor Jeanneret esser bain accessibels tant per la generaziun giuvna sco era per il sport da massa. «En il sector dal sport da prestaziun ha la regenza la finamira d'avair ina buna rait da scolas da talents e da scolas medias da sport, ma era scolas professiunalas che facilitechan la cumpatibladad dal sport da prestaziun e la scola», ha ditg *Martin Jäger*, «per optimar las cundiziuns generalas per promover ils talents giuvens duai il chantun sustegnair centers da prestaziun regionalas e nazionalas cun contribuiziuns da gestiun.» La regenza vules era cuntinuar ad optimar las cundiziuns generalas per realisar en Grischun occorrenzas sportivas nazionalas ed internaziunalas. Plinavant duai vegnir extendida la purschida d'infurmaziun e cussegliaziun en il chantun. Las vischnancas èn supplitgadas da nominar persunas da contact per sport che vegnan ad avoir l'incumbensa da coordinar las purschidas existentas e d'inziar novas prestaziuns. Remo Cavegn ha ludà il concept per promover il sport en Grischun: «Cun quel na pon ins betg mo mantegnair il status quo, uschia vegn il sport grischun era rinforzà», ha ditg il president da l'UGS, «cun laschar elavurar quest concept ha la regenza accumpi plainamain l'incumbensa ch'il cusseglier grond l'aveva dà.»